

На Утрени, На Бог Господь:

Тропарь, глас 4:

Рождество Твое Богородице Дéво,/ рáдость возвести всей вселénней:/ из Тебе бо возсия солнце правды Христос Бóг наш,/ и разрушив клятву, даде благословéние,// и упразднив смерть, дарова нам живот вечный. [Дважды].
Слава и ныне: Тойже.

Величание:

Велича́ем Тя, Пресвятая Дéво,/ и чтим святы́х Твоих роди́телей,/ и всесла́вное сла́вим// рождество́ Твое.

Псалом избранный:

Помяни́, Го́споди, Дави́да и всю крóтость его́./ Я́ко кля́тся Го́сподеви, обеща́хся Богу Иа́ковлю./ Се слы́шахом я во Евфра́фе, обрето́хом я в поля́х дубра́вы./ Пресла́вная глаго́лашася о Тебе, гра́де Бо́жий./ Бог посреде́ его́, и не подви́жится./ Кля́тся Господь Давиду́ и́стиною и не отвéржется ея́./ От пло́да чре́ва Твоего́ посажду́ на престо́ле Твоём./ Я́ко избра́ Господь Сио́на, изво́ли его́ в жили́ще Себе́./ Освяти́л есть селéние Своё Вы́шний./ Святы́ня и велеле́пота во святи́ле Его́./ Свят храм Твой, дивен в правде./ До́му твоему́ подоба́ет святы́ня, Го́споди, в долготу́ дней./ Помяну́ имя Твое во всяком ро́де и ро́де./ Благословéн Господь во век и в век ве́ка.

Слава Отцу и сыну и Святому Духу и ныне и присно и во веки веков. Аминь.

Аллилуия, аллилуия, аллилуия, слава Тебе, Боже. Трижды.

Степенна, 1-й антифон 4-го гласа. Прокимен, глас 4: Помяну имя Твое во всяком роде и роде.

По 50-м псалме, Слава: Молитвами Богородицы,/ Милостиве, очисти// множества согрешéний наших.

И ныне, тойже.

И посем, Помилуй мя, Боже:

И стихира праздника, глас 6:

Сей день Господень, радуйтесь лю́дие:/ се бо све́та черто́г/ и книга слова животно́го из утробы произы́де,/ и яже к востоком дверь ро́ждшися,/ ожидает входа Святителя Вели́каго,/ Едина и Единого вводящи Христа во вселénную,// во спасéние душ наших.